

KONTROL MOZIOA

Ekialdeko Barrutiaren aurrekontua kudeatzeko moduari buruzkoa

Zigor Etxeburua Urbizuk eta Marta Huarte Pañok, hurrenez hurren EH Bildu eta Elkarrekin-Donostia udal taldeetako zinegotziek, Udalbatzaren Organo Araudiko 98. artikulua oinarri, mozio hau aurkeztu dute, Udalbatzan azter dadin. Mozioa, 2021eko urtarrilaren 18an, Ogasuneko batzordean, aztertutako interpelazioan dago oinarrituta.

JUSTIFIKAZIOA

Ekialdeko Barrutiaren aurrekontua kudeatzeko moduak zalantzak eragiten dizkigu, ez baitugu uste aski eraginkorra denik. Barrutiaren lehen bi urteetako aurrekontuek gorabehera handiak izan dituzte, eta kalte eta galera handiak eragin dizkio egitura berriari.

Barrutiak diru sail bat du esleitua erabakitako egitasmoak aurrera eramateko. Edonola, Barrutiak berak ez du diru sail horiek baliatzeko aukerarik edo eskumenik, eta diruak Parte Hartzeko Sailean egoten dira. Egitasmoak aurrera eramateko prozedura korapilatsua da: Udalaren aurrekontu orokorra onartu ostean, Barrutiak erabaki egiten du zein egitasmo egin dagokion diru sailarekin. Hau da, egitasmo horiek ez dira egoten zehatz adierazita udal aurrekontu orokorrean. Gauzak horrela, egitasmoak gauzatu behar dituzten udal sailek ez dituzte urteko beren aurreikuspenetan izaten Barrutian egin beharreko egitasmoak, eta horrek epeak luzatzea eragiten du.

Urteko lehen hilabeteetan, Parte Hartzeko Sailak helarazi egiten dizkie egitasmoak dagozkien udal sailei, ezagutu eta abian jar ditzaten. Harreman horretan ere denbora behar izaten da. Horren guztiaren ondorioz, Barrutiko egitasmoak gauzatzeko epeak estutu egiten dira, eta egitasmoak egin gabe geratzeko arriskua handitu egiten da. Prozedura hori are gehiago korapilatzen da egitasmoaren bultzatzailea Udaletik kanpoko eragile bat delarik, parte hartzeko aurrekontuetan gertatu den bezala.

Urtarrileko batzordean, EH Bilduk galdetu zion Ogasuneko zinegotziari zer dela eta Udal Gobernuak ez duen prozedura arinago eta erosoago bat baliatzen Ekialdeko Barrutiaren aurrekontua baliatzeko, eta zer aukera ikusten duen diru saila erabiltzeko prozedura hori eraginkorragoa izan dadin. Zinegotziaren arabera, prozedura eraginkorragoa izateko, Barrutiak bere egitasmoak erabaki beharko zituen udal aurrekontu orokorra erabaki baino lehen, bertan ageri daitezkeen egitasmoak, dagozkien udal sailen ekimenekin batera. Horrela, udal sail bakoitzak edukiko luke egitasmo bakoitzaren ardura urte hasieratik (udal aurrekontuaren ohiko egutegia berreskuratuz gero). Gogoan izan behar da, gainera, Barrutien Organo Araudiak 17. artikuluan jadanik ezartzen duela Ogasun Zinegotzigoak eskatu beharra diola barrutiko buruari Barrutiaren beharrei buruzko txosten bat, udal aurrekontuak egiteko aldiaren hasieran.

Gauzak horrela, eta jakinik Barrutiaren 2020ko aurrekontua ez dela gauzatu, baina diru sail horrekin egin beharreko egitasmoak dagoeneko zehaztuta daudela, aukera ezin hobea dugu 2021eko aurrekontu orokorrean txertatzeko Barrutiaren 2020ko egitasmoak, eta horrela, prozedura eraginkorrago batekin hasteko, behingoagatik.



Prozedura berri hori egokitzen joz gero, eta udal aurrekontuaren ohiko egutegiari jarraiki, Ekialdeko Barrutiko udalbatzarrak prest izan beharko lituzke 2021eko azken hiruhilekoan hurrengo urterako egitasmoak; eta modu berean urtez urte. Jakina, hori guztia egin beharko litzateke Barrutiaren udalbatzarraren onespenerekin.

Horiek horrela, honako hau da behean sinatzen duen zinegotziak aurkeztutako KONTROL MOZIOA:

KONTROL MOZIOA

1. Udalbatzak hertsatuki eskatzen dio Donostiako Udal Gobernuari eska diezaiola Ekialdeko Barrutiko buruari, Barrutien Araudi Organikoak ezarri bezala, Barrutiaren beharrei buruzko txosten bat, 2021eko udal aurrekontuak egiteko aldiaren hasieran.
2. Udalbatzak hertsatuki eskatzen dio Donostiako Udal Gobernuari adostu dezala Ekialdeko Barrutiko udalbatzarrarekin 2021eko Barrutiaren aurrekontua baliatzeko prozedura arinago eta eraginkorrago bat, hurrengo urteetan ere baliatzeko modukoa izango dena.
3. Udalbatzak hertsatuki eskatzen dio Donostiako Udal Gobernuari malgutasuna izan dezala Ekialdeko Barrutiaren aurrekontua erabaki eta gauzatzeko garaian, pairatu dituen gorabehera guztiak kontuan izanik.

Donostian, 2021eko urtarrilaren 22an.

Zigor Etxebarua Urbizu
EH Bildu udal taldeko zinegotzia

Marta Huarte Paño
Elkarrekin Donostia udal taldeko zinegotzia